

諸史考異

諸史考異卷四

臨海洪頤煊撰

宋書上

綏輿里

武帝紀彭城縣綏里人頤煊案綏下脫輿字南史宋武帝紀彭城縣綏輿里人劉延孫傳帝室居綏輿里輿卽輿字之譌

庾禕之

玄又遣武騎將軍庾禕之配以精卒利器助謙等頤煊案晉書桓玄傳作遣武衛將軍庾頤之禕頤聲相近

桓歆

桓玄兒子韶聚眾向歷陽高祖命輔國將軍諸葛長民擊走之

頤煊案詔當作歆桓玄傳桓歆聚黨向歷陽宣城内史諸葛長民擊破之諸葛長民傳於時桓歆聚眾向歷陽長民擊走之皆不言玄子桓謙兄桓歆封臨賀縣王此紀失之

孫季高

義熙七年二月盧循至番禺爲孫季高所破收餘眾南走頤煊案晉書盧循傳循還保廣州裕先遣孫處從海道據番禺城循攻之不下孫處傳字季高會稽永興人籍注季高故字行於世崩年六十七

永初三年五月癸亥上崩於西殿時六十七頤煊案高祖以晉哀帝興寧元年歲癸亥三月壬寅夜生下距永初三年止六十七歲七字當衍

隆字不諱

文帝紀諱義隆頤煊案張茂度傳名與高祖同故稱字王景文傳名與明帝諱同臣下於諸帝皆避諱此奉迎表給事中游擊將軍龍鄉縣侯臣隆所謂二名不偏諱也

東壽張

元嘉八年正月丁酉征南大將軍檀道濟破索虜於東壽張頤煊案檀道濟傳元嘉八年率眾北討軍至東平壽張縣大破之此東下脫平字

益州二郡

十二年八月壬申於益州立南晉壽新巴西三郡頤煊案此文錯謬當云南晉壽南新巴西二郡州郡志南晉壽南新巴西二郡皆

文帝元嘉十二年立

安固六郡

十六年二月癸亥割梁州之巴西梓潼南宕渠南漢中南秦州之南安懷遠凡六郡屬益州頤煊案州郡志秦州上無南字南安當作安固張茂度傳太祖元嘉元年出爲使持節督益遠二州梁州之巴西梓潼宕渠南漢中秦州之懷遠安固六郡諸軍事吉翰傳元嘉三年徙督益遠二州梁之巴西梓潼宕渠南漢中秦州之安固懷遠六郡諸軍事皆其證

加督秦州

孝武帝紀元嘉二十一年加督秦州進號撫軍將軍頤煊案文帝紀二十一年南豫州刺史武陵王贊加撫軍將軍無加督秦

州四字

荆湘

孝建元年六月分荆襄江豫州立郢州顧煊案襄當作湘州郡志孝建元年分荆州之江夏竟陵隨武陵天門湘州之巴陵江州之武昌豫州之西陽立郢州

懷漢郡

大明元年三月梁州獠求內屬立懷漢郡顧煊案州郡志梁州懷漢太守孝武孝建二年立在大明前一年

浙東大旱

七年十一月乙未原放行獄徒繫東諸郡大獄顧煊案此條文有脫誤當從南史作原放行獄徒繫浙江東諸郡大旱故下文

遺使開倉賑恤本二事俗人誤改爲一

白帽

明帝紀壽寂之等殞廢帝於後堂於時事起倉卒上失履跣至西堂猶著烏帽坐定休仁呼主衣以白帽代之顧煊案南齊書柳世隆傳沈攸之曰我被太后令建議下都大事若剋白紗帽其著耳禮志晉書輿服志皆不詳白帽之制唐六典乘輿之服則有白紗帽皇太子之服則有烏紗帽宋制當亦相同

宋安郡

泰始六年十二月戊戌以始興郡爲宋安郡顧煊案州郡志明帝泰始六年立岡浚縣割始興之封陽陽山含涯四縣立宋郡司州環水縣下云孝武大明八年省義陽郡所統東隨二

郡立爲宋安縣屬義陽明帝立爲郡魯爽傳爽至汝南加督豫州之義陽宋安二郡軍事領義陽內史俱與此不同

西豫州

後廢帝紀泰豫元年閏月割南豫州南汝陰郡屬西豫州西豫州廬江郡屬豫州頤煊案州郡志作泰豫元年以南汝陰度屬豫州豫州之廬江度屬南豫州豫卽豫州廬江郡本西豫改屬南豫州此於豫州上脫南字

徐岳

厯志吳中書令闕澤受劉洪乾象法於東萊徐岳字公河頤煊案徐岳數術紀遺一卷北周甄鸞注晉書律厯志皆稱東萊徐岳不言其字公河

禹將受位

禮志樂稽曜嘉曰禹將受位天意大變迅風雷雨以明將去虞而適夏也頤煊案史記五帝本紀堯使舜入山林川澤暴風雷雨舜行不迷此古文尙書說王肅乃謂麓錄也堯使舜大錄天下萬機之政此作禹將受位與尙書異

二月乙卯

元嘉四年二月己卯太祖東巡丁卯至并徙己巳告觀園陵三月甲戌幸丹徒離宮頤煊案己卯當從文帝紀作乙卯三月甲戌二月不得有己卯是傳寫之譌

糞土臣

拜刺史二千石辭闕板文云某官糞土臣及某甲臨官稽首再

拜頤煊案晉書禮志穆帝納皇后何氏納采主人曰前太尉參軍都鄉侯龔士臣何琦稽首再拜承詔其證也

處士府君

宋武帝初受晉命爲宋王建宗廟於彭城皇祖東安府君皇考處士府君頤煊案武帝紀混生東安太守靖靖生郡功曹翹是爲皇考與此稱處士府君異

徐達之

樂志督護哥者彭城内史徐達之爲魯軌所殺達之妻高祖長女也頤煊案徐湛之傳父達之尙高祖長女會稽公主爲振威將軍彭城沛二郡太守達是達字之譌高祖紀亦作徐達之

栢槃舞

晉初有柷槃舞史臣按柷槃舞今之齊世寧也顧煊案晉書樂志杯柝舞太康中天下爲晉世寧齊史臣改作齊世寧而休文沿用之下文秦始歌詞有宋世寧虞繅造

寧海衍文

符瑞志後廢帝元徽元年正月甲午白麀見海陵寧海寧海太守孫嗣之以獻顧煊案州郡志寧海令屬海陵太守未嘗自立郡其言太守者海陵太守也志衍重寧海二字

婦女無纏足

五行志昔初作履者婦人圓頭男子方頭晉太康初婦人皆履方頭與男無別顧煊案史記秦本紀繆公虜晉侯以歸夫人聞之乃衰絰跣後漢書伏皇后傳華歆就牽后被髮徒跣行王良

傳妻布裙曳柴從田中東觀記作徒跣曳柴隸續載武梁祠堂畫像曾子母坐機上足與男子無異此皆古婦女無纏足之證

會州

州郡志揚州刺史孝建元年分揚州之會稽東陽新安永嘉臨海五郡爲東揚州顧煊案元凶劭傳三月分浙以東五郡爲會州事在元嘉三十年竟陵王誕傳元凶弒立以揚州浙江西屬司隸校尉浙江東五郡立會州以誕爲刺史志不載會州之名

永平

永世令吳分溧陽縣爲永平縣又有平陵縣董覽吳地志云晉分永世太康永寧顧煊案太平寰宇記輿地志云元帝割丹陽永平縣爲平陵縣永寧當是永平之譌

黟縣

新安太守領縣五頤煊案黟令漢舊縣當別爲一縣傳寫者誤連在海寧令下

逡道

淮南逡道令漢作逡道晉作逡道頤煊案晉書地理志亦作逡道左氏哀十二年杜預注橐皋在淮南逡道縣東南陸德明音義道音囚

陵縣

臨海廣陵令前漢屬泗水後漢屬廣陵錢氏考異云陵當作淩廣字衍頤煊案南彭城北陵令晉太康地志屬下邳本名陵而廣陵郡舊有陵縣晉武帝太康二年以下邳之陵縣非舊土而

同名改爲北陵浚字久改作陵

西海郡

東海太守明帝失淮北僞立青州於贛榆縣泰始七年又割贛榆置鬱縣立西海郡並隸僞青州頤熒案明帝紀泰始七年七月於冀州置西海郡其時冀州寄治亦在僞青州鬱縣鬱縣亦作鬱州

東平

南兖州諸僞郡縣何志又有鍾離雁門平原東平北沛五郡東平原領范朝陽歷城三縣頤熒案東平原當作東平衍原字北沛志作南沛

南梁郡

南梁太守孝武大明六年廢屬南豫改名淮南頤煊案孝武帝紀大明六年三月乙巳改豫州南梁郡爲淮南郡是其時廢屬豫州非南豫也下文豫州刺史永初郡國何徐寄治睢陽睢陽卽南梁郡治所

陳郡谷陽

東郡太守永初郡國無萇平谷陽頤煊案東郡當依豫州下作陳郡父陽令是谷陽之譌太平寰宇記谷陽蓋谷水之陽因以爲名依字當作穀陽

隨陽郡

隨陽太守晉武帝太康年又分義陽爲隨國屬荊州明帝泰始五年還屬郢改爲隨陽頤煊案明帝紀泰始五年四月辛未割

雍州隨郡屬郢州未嘗改名隨陽後廢帝紀元徽四年九月丁亥割郢州之隨郡屬司州順帝紀昇明二年十二月甲子改封南陽王潮爲隨郡王改隨陽郡志誤

王忱治江陵

荊州刺史桓溫治江陵桓沖治上明王說還江陵此後遂治江陵頤煊案王說是王忱之譌南齊書州郡志太元十四年王忱還江陵自忱以來不復動移晉書王忱傳太元中出爲荊州刺史

建昌郡

湘州建昌郡晉惠帝元康九年分長沙東北下雋諸縣立成帝咸康二年省頤煊案志湘州無建昌郡孝武帝紀孝建元年於

雍州立建昌郡志於雍州云建昌太守孝建元年刺史朱脩之免軍戶爲永興永寧二縣立建昌郡與此不同當是其重立時地如此

南秦州

秦州刺史領郡十四頤煊案文帝紀元嘉十四年劉道眞爲梁南秦二州刺史十九年裴方明爲梁南秦二州刺史二十六年劉秀之爲梁南秦二州刺史大明四年柳叔仁爲梁南秦二州刺史永光元年劉道隆爲梁南秦二州刺史元徽四年范柏年爲梁南秦二州刺史凡秦州上皆加南字以別於北秦州也

博羅

南海博羅漢舊縣二漢皆作博字晉太康地志作博頤煊案今

本漢書地理志續漢書郡國志皆作博羅無作博字者

南蘭陵

孝懿蕭皇后傳蘭陵蘭陵人也頤煊案州郡志蘭陵郡無蘭陵縣蘭陵縣屬南蘭陵郡晉書地理志元帝過江後置南蘭陵郡上省南字非是蕭思話傳南蘭陵人孝懿皇后弟子也亦有南字

戒涼在碑

文帝袁皇后傳戒涼在律頤煊案文選袁皇后哀冊文作戒涼在碑李善注儀禮日死三日而殯三月而葬說文日殯瘞也此作律因字形相近而譌

康樂公主

孝武文穆王皇后傳生康樂公主修明頤煊案南齊書徐孝嗣傳祖湛之父聿之孝嗣風儀端簡宋孝武甚愛之尙康樂公主臨汝公主

左光祿大夫江湛孫敷當尙世祖女上乃使人爲敷作表讓婚曰伏承詔旨當以臨海公主降嬪頤煊案何尙之傳顯之尙太祖第四女臨海惠公主封號不應同名南齊書江敷傳尙孝武女臨汝公主拜駙馬都尉臨海當是臨汝之譌

東城

劉穆之傳十二年高祖北伐畱世子爲中軍將軍監太尉畱府轉穆之左僕射領監軍中軍二府入居東城頤煊案武帝紀作入居東府義熙十年息民簡役築東城起府舍高祖府在東城

故亦稱東府孝懿蕭皇后傳高祖在外凡五年后常留東府是也

下官致敬

先是郡縣爲封國若自吏相並於國主稱臣去任便止至世祖孝建中始革此制爲下官致敬頤煊案蕭思話傳元凶弑立以爲徐兗二州刺史起義以應世祖遣使奉牋曰下官近在歷下袁淑傳出爲始興王濬征北長史淑答曰朝廷遣下官本以光公府望也南史廬陵王義真傳義真獨逃草中中兵參軍段宏單騎追尋義真曰可刎身頭使家公絕望宏泣曰死生共之下官不忍皆在孝建前稱下官未嘗稱臣

富陽公主

徐羨之傳子喬之尙高祖第六女富陽公主頤熒案前廢帝何
皇后傳父瑀尙高祖少女豫章康長公主諱欣男公主先適徐
喬卽喬之從誅後公主改適何瑀改封豫章康長公主

荀中郎

謝晦傳昔荀中郎年二十七爲北府都督卿比之己爲老矣頤
熒案晉書荀羨傳作時年二十八中興方伯未有如羨之少者
佛佛

王鎮惡傳時西虜佛佛強盛姚興世侵擾北邊高祖旣至長安
佛佛畏憚不敢動頤熒案卽赫連勃勃佛勃同聲字

避諱稱字

向靖傳小字彌名與高祖同改稱小字頤熒案孔靖傳字季恭

名與高祖祖諱同故稱字此高祖下脫祖諱二字休文於帝諱同者直稱其字如張茂度王景文傳是也祖諱同者存其名改稱其字如向靖孔靖傳是也蓋其例如此

奔慕容德

劉敬宣傳敬宜奔喪哭畢乃奔鮮卑慕容德爾煊案晉書劉敬宣傳作與廣陵相高雅之俱奔慕容超以載記考之慕容德以義熙元年死超以義熙元年嗣僞位敬宜還至京師任安帝元興三年則作慕容德是也桓玄傳亦作高雅之敬宜並奔慕容德

南齊國內史

劉鍾傳除南齊國內史爾煊案州郡志南兖州有南齊郡領安

西臨菑凡二縣後省屬南徐州卽此國也

羅企生

胡藩傳藩外兄羅企生爲仲堪參軍頤煊案晉書殷仲堪傳忠義傳俱作羅企生說文企人在山上企舉踵也二字不同

半城

又遣藩及朱超石等追索虜於平城頤煊案南史作半城劉懷慎傳子榮祖與朱超石大破索虜於半城是也魏書崔浩傳作畔城

新康

劉康祖傳虔之封新庸縣男康祖虔之子也襲封頤煊案索虜傳新康縣開國男劉康祖南史亦作虔之封新康縣男

諸史考異卷四終

番禺沈寶樞初校陳慶修覆校

諸史考異卷五

臨海洪頤煊撰

宋書下

寧孟

長沙景王道憐傳道憐率寧孟龍驤將軍孔隆及穆之等追眞
蘭頤煊案寧孟文有脫誤當云率寧遠將軍孟龍符因涉下文
而譌

新喻侯

以破索度眞功封新喻縣男子義宗幼爲高祖所愛賜爵新喻
縣男永初元年進爵爲侯頤煊案彭城王義康傳新喻侯義宗
州郡志無新喻縣元和郡縣志新喻縣本漢宜春縣地吳孫皓

分置新渝縣以渝水爲名今日新喻因聲變也

吳國內史

庾悅傳祖義吳國內史頤煊案晉書列傳作庾羲吳興內史

謝安從孫

謝景仁傳高祖嘗謂景仁是太傅安孫頤煊案景仁祖據太傅安第二弟景仁是太傅安從孫

袁湛

袁湛傳字士深父文質琅邪內史湛以后父追贈侍中左光祿大夫開府儀同三司謚曰敬公頤煊案文帝袁皇后傳父湛之自有傳晉書列傳袁質字道和子湛無文字

褚淡之

褚叔度傳兄秀之弟淡之高祖令淡之兄弟視褚后后出別室相見兵人乃踰垣而入頤煊案晉書恭帝紀作裕使后兄叔度請后有聞

秋當

張茂度傳中書舍人秋當爲太祖所信委家在海陵死還葬橋路毀壞不通頤煊案南齊書陸慧曉傳作秋當假還葬父此脫父字

江彪

江夷傳祖晉護軍將軍頤煊案南史傳同而皆失其名陳書江總傳余六世祖宋尚書右僕射州陵侯侯之王父晉護軍將軍彪據此可補其闕

五等侯

徐廣傳義熙初除鎮軍諮議參軍領記室封樂成縣五等侯
頤煊案晉書徐廣傳作封樂成侯無五等二字

袁顗

蔡興宗傳外甥袁顗始生彖頤煊案袁顗當作袁覲南齊書袁
彖傳祖洵吳郡太守父覲武陵太守覲臨終與兄顗書云云顗
見誅宋明帝投顗尸江中彖微服潛行求尸密瘞袁顗傳作弟
子彖微服求訪則袁彖是袁覲子也

澱水

張暢傳程天祚一介常人近於汝陽身被九創落在殿外我手
牽而出之頤煊案魏書李孝伯傳作落在澱水我使牽而出之

棄官稱訴

范泰傳荊州刺史王忱泰外弟也請爲天門太守會忱病卒召泰爲驃騎咨議參軍遷中書侍郎顧煊案晉書范甯傳補豫章太守在郡改革舊制不拘常憲江州刺史王凝之上言子泰時爲天門太守棄官稱訴傳不言棄官稱訴

王珣

王韶之傳韶之爲晉史序王珣貨殖王廐作亂珣子弘廐子華並貴顯韶之懼爲所陷顧煊案今晉書王珣傳不言貨殖事王廐事見宋書王華傳

段宏

廬陵王義真傳段宏鮮卑人也爲慕容超尙書左僕射徐州刺

史高祖伐廣固歸降頤煊案晉書慕容超載記作徐州刺史段宏奔於魏當是其後歸降高祖

西省

江夏王義恭傳世祖入討劭疑義恭有異志使入住尚書下省分諸子並住神虎門外侍中下省劭遣始興王濬就西省殺義恭十二子頤煊案王詔之傳晉帝自孝武以來常居內殿以省官一人管司詔誥任在西省因謂之西省郎詔之遷黃門侍郎領著作郎西省如故西省卽侍中省也

豫寧縣侯

王曇首傳以預誅徐羨之等謀追封豫寧縣侯諡曰文侯頤煊案王弘傳故散騎常侍左光祿大夫太子詹事豫章文侯曇首

王僧綽傳曇首子襲封豫章縣侯南史王儉傳襲爵豫寧縣侯
梁書王志傳祖曇首宋左光祿大夫豫章文侯晉書地理志豫
章郡有豫章縣無豫寧州郡志豫章太守有豫寧侯相無豫章
其本封在豫章縣後隨縣改名作豫寧故前後不同而州郡志
不言

江邃文釋

沈演之傳江邃字元遠濟陽考城人頗有文義官至司徒記室
參軍撰文釋傳於世頤煊案舊唐書經籍志江邃文釋十卷史
記蘇秦列傳索隱引江邃曰揣人主之情摩而迎之其意當矣
文選長笛賦注孫卿子曰昔瓠巴鼓琴江邃文釋曰瓠巴齊人
也陸士衡猛虎行注江邃文釋曰管子曰夫士懷耿介之心不

文
蔭惡木之枝惡木尙能恥之況與惡人同處皆是雜釋諸家之

何恢

何尙之傳曾祖準高尙不應徵辟祖恢南康太守頤煊案晉書
何準傳準三子放悵澄悵官至南康太守恢乃悵字之譌

佛教自殺

彭城王義康傳遣中書舍人嚴龍賁藥賜死義康不肯服藥曰
佛教自殺不復得人身便隨宜見處分乃以被掩殺之頤煊案
褚叔度傳兵士乃踰垣而入進藥於恭帝帝不肯飲曰佛教自
殺者不得復人身乃以被掩殺之與義康語同

江湛

江湛傳劭之入弑也湛值上省聞叫噪之聲乃匿旁小屋中劭遣收之舍吏給云不在此兵士卽殺舍吏乃得湛之湛之據窗受害意色不撓頤煊案此受害者是江湛故載在本傳徐湛之江湛同時受害其情狀略同校者不察誤於兩湛下添兩之字

直勤

南平王鐔傳虜永昌王宜勤庫仁眞救虎牢頤煊案宜勤當作直勤索虜傳使持節征東大將軍安定王直勤伐伏立侍中尙書左僕射安西大將軍平北公直勤美晨新唐書突厥傳可汗者猶古之單于其子弟謂之特勤特直同聲字

劉憲之

顏延之傳妹適東莞劉憲之穆之子也頤煊案劉穆之傳穆之

三子長子慮之中子式之少子貞之無名憲之者慮憲字形相近

司州五郡

魯爽傳爽可督司州陳畱東郡濟陰濮陽五郡諸軍事征虜將軍司州刺史頤煊案五郡止四郡其時邊郡遷立不常又有遙領僑郡故與州郡志司州所屬不同

魯爽反

孝建元年二月義宣報爽秋當同舉爽狂酒乖謬即日便起兵孝武帝紀孝建元年二月庚午豫州刺史魯爽反頤煊案柳元景傳沈慶之傳皆作孝建元年秋冬舉兵爽狂酒失旨其年正月便反

今皇帝

沈攸之傳今皇帝卽位聽攸之及諸子喪還葬墓頤煊案休文自序永明五年被敕撰宋書六年二月畢功表上之今皇帝者齊武帝也

義陽郡

朱修之傳義興平氏人也祖序豫州刺史頤煊案州郡志義興郡無平氏縣晉書朱序傳義陽人州郡志平氏縣屬南義陽郡南史本傳作義陽平氏人

前廢帝

王玄謨傳少帝旣誅顏師伯柳元景等狂悖益甚以領軍徵玄謨及至屢表諫諍少帝大怒頤煊案少帝卽前廢帝事見本紀

宗越

玄謨性嚴刻少恩宗越御下更苛酷軍士爲之語曰寧作五年徒莫逢王玄謨玄謨猶自可宗越更殺我願煊案此語宗越傳亦載之

蕭源之

蕭思話傳父源之南琅邪太守永初九年卒願煊案永初無九年思話孝建二年卒時年五十年十八除琅邪王大司馬行參軍轉相國參軍父憂去職源之卒當在永初三年間

尋陽公主

廬江王祗傳往又經尋陽公主第兄弟共集願煊案梁書高祖郃皇后傳父燧尙宋文帝女尋陽公主

山陰公主淫縱

豫章王子尚傳山陰公主楚玉肆情淫縱以尚書吏部郎褚淵貌美請自侍十日廢帝許之淵雖承旨而行以死自固楚玉不能制也顧煊案此事前廢帝紀已載此爲重出

劉湛之

顧琛傳初義康請琛入府琛不能承事劉湛之尋見斥外顧煊案當作劉湛范晔傳沈慶之傳劉湛皆作劉湛之

寘諸掌

周朗傳昔仲尼有言治天下若寘諸掌顧煊案禮記中庸治國其如示諸掌乎鄭注示讀如寘諸河干之寘寘置也物而在掌中易爲知力者也此從鄭義

吳喜公

吳喜傳本名喜公太宗滅爲喜頤煊案明帝紀泰始二年二月建武將軍吳喜公王玄謨傳玄謨馳啟孝武帝具陳本末帝遣主書吳喜公撫慰之魏書尉元傳作吳愔公

戴凱之

鄧琬傳琬遣武昌戴凱之爲南康相世子率眾攻之凱之戰敗遁走頤煊案舊唐書經籍志竹譜一卷戴凱之撰晁公武郡齋讀書志竹譜一卷戴凱之撰凱之字慶預武昌人隋書經籍志別集宋人有戴凱之集六卷時代與此合

坐選免官

謝莊傳六年又爲吏部尙書領國子博士坐選公車令張奇免

官事在顏師伯傳頤煊案顏師伯傳作七年

袁愍孫改名

袁粲傳愍孫幼慕荀奉倩之爲人白世祖求改名爲粲不許至是言於太宗乃改爲粲字景倩焉二年遷領軍將軍頤煊案明帝紀泰始二年正月癸巳以司徒左長史袁愍孫爲領軍將軍蔡興宗傳尙書袁愍孫牒請免愍孫所居官其時尚未改名

烏傷令

王弘之傳家貧而性好山水求爲烏程令頤煊案南史作烏傷令

宋書體例不同

徐爰傳僞玄篡竊同於新莽雖靈武克殄自詳之晉錄及犯命

干紀受錄霸朝雖揖讓之前皆著之宋策詔曰項籍聖公編錄
二漢前史已有成列桓玄傳宜在宋典顧煊案與休文宋書體
例不同魏書島夷桓玄島夷劉裕二傳並列其意亦與爰同

陽武

索虜傳毛德祖滎陽南武陽人顧煊案晉書地理志南武陽屬
泰山郡毛德祖傳璩宗人璩祖毛寶滎陽陽武人南武陽當是
陽武之譌

苞橋水

虜望元敬後有軍引去趨苞橋至欲渡清河沛縣民燒苞橋夜
於林中擊鼓虜謂官軍大至爭渡苞水水深溺死殆半顧煊案
水經泗水注引作泡橋泡水清河卽泡水之別名也

趙敗

大凡渠蒙遜傳河西人趙敗善厯筭十四年茂虔奉表獻周髀一卷趙敗傳并甲寅元厯一卷頤煊案隋書經籍志周髀一卷趙嬰注河西甲寅元厯一卷涼太史趙敗撰趙嬰疑卽趙敗之諱

皇子劭生

元凶劭傳帝卽位後生劭時上猶在諒闇故祕之二年閏正月方云劭生頤煊案二年當作三年文帝紀元嘉三年正月閏月丙戌皇子劭生

臨賀公主

遣閭人奚承祖詰讓劭曰臨賀公主南第先有一下人欲嫁聞

此下人養他人奴爲兒而汝用爲隊主頤煊案東陽公主第在西掖門外故稱南第王鸚鵡是東陽公主應閣婢非臨賀也此四字蓋涉上文而衍南史南第上無臨賀公主四字

孟昶

自序劉毅何無忌魏詠之檀憑之孟昶諸葛長民志在興復情非造宋頤煊案宋書旣無孟昶傳晉書亦無孟昶傳孟昶與武帝同起義其事蹟僅散見於紀傳知其爲鎮北主簿丹陽尹左僕射封臨汝公而已志在興復事無考

諸史考異卷五終

番禺沈寶樞初校陳慶修覆校

諸史考異卷六

臨海洪頤煊撰

南齊書

侍中彪

高帝紀何子鄮定侯延生侍中彪頤煊案新唐書宰相世系表蕭氏鄮文終侯何二子遺則則生彪漢書蕭何傳更封小子延爲鄮侯薨子遺嗣薨無子遺弟則嗣此作延生彪非是

吳郡太守冰

闡生吳郡太守永頤煊案梁書武帝紀闡生吳郡太守冰新唐書宰相世系表亦作冰

胡宗之

太祖與質別軍主胡宗之等五軍前驅宗之等皆陷沒頤煊案
宋書蕭思話傳作胡崇之魏書世祖紀亦作胡崇之

平鄉縣侯

建元元年降差之典宜遵往制南康縣公華容縣公可爲侯平
鄉縣侯可爲伯減戶有差以繼劉穆之王弘何無忌後頤煊案
晉書何無忌傳以興復之功封安城郡開國公當是宋初減降
改封平鄉縣侯而本傳不載南史作萍鄉侯

朱方姑熟二縣

武帝紀永明十一年京師二縣朱方姑熟可權斷酒頤煊案上
文上卽位癸未詔曰頃水雨頻降潮流荐滿二岸民居多所淹
漬遣中書舍人與兩縣官優量賑恤戊戌詔曰建康秣陵二縣

貧民加賑賜必令周悉卽此所謂京師二縣也宋書州郡志丹徒古朱方南東海郡治姑熟卽于湖淮南郡治皆京邑重鎮故連言之

梁王

明帝紀建武二年七月王申以冠軍將軍梁王爲司州刺史頤煊案梁書武帝紀是時未封梁王而稱梁王者是史臣追書

司徒西閣祭酒

禮志永明二年司徒西閣祭酒梁王議頤煊案武帝紀永明二年正月以竟陵王子良爲護軍將軍兼司徒梁書武帝紀竟陵王子良開西邸招文學高祖與沈約謝朓王融蕭琛范雲任昉陸倕等並遊焉號曰八友

五行成數

樂志月令木數八火數七土數五金數九水數六蔡邕云東方有木三土五故數八南方有火二土五故數七西方有金四土五故數九北方有水一土五故數六頤煊案月令其數八鄭注木生數三成數八但言八者舉其成數正義皇氏用先儒之義以爲金木水火得土而成以水數一得土數五故六也火數二得土數五爲成數七木數三得土數五爲成數八金數四得土數五爲成數九此卽蔡邕之說

蘭雲

天文志永明六年三月甲申日於蘭雲中薄半暈須臾過而隆昌元年正月壬戌日於蘭雲中暈南北頤煊案永明八年六月

戊寅日於蒼白雲中南北各生一珥蘭雲卽藍雲假借字

南東海郡

州郡志南東海郡祝其襄賁西隰頤煊案宋書州郡志南東海無此三縣永初郡國有襄賁祝其厚邱西隰四縣文帝元嘉十二年省厚邱併襄賁何徐無厚邱餘與永初郡國同其襄賁祝其西隰是徐志後所省也此又是大明以後復立

西豫州

建元二年太祖以西豫吏民寡刻分置兩州損費甚多省南豫永明二年割揚州宣城淮南豫州歷陽譙廬江臨江六郡復置南豫州四年冠軍長史沈憲啟二豫分置以桑棵子亭爲斷潁川汝陽在南譙歷陽界內悉屬西豫廬江居晉熙汝陰之中屬

南豫求以潁川汝陽屬南豫廬江還西豫頤煊案宋志永初二
年分淮東爲南豫州淮西爲豫州其時稱西豫者卽豫州也

鬱州

青州宋泰始初淮北沒虜六年始治鬱州上鬱州在海中週迴
數百里劉善明爲刺史以海中易固不峻城雉乃累石爲之高
可八九尺後爲齊郡治建元初徙齊郡治瓜步以北海治齊郡
故治頤煊案元和郡縣志海州東海縣本漢贛榆縣地俗謂之
鬱州僑立青州亦謂之田橫島宋書州郡志明帝失淮止於鬱
州僑立青州立齊北海西海郡故北海僑治亦在鬱州

南北秦州

宋文帝爲荊州都督督秦州又進督北秦州永明郡國志秦州

寄治漢中南鄭不曰南北元嘉計偕亦云秦州而荊州都督常
督二秦梁南秦一刺史是則志所載秦州爲南秦氏爲北秦顧
煊案宋書文帝紀改授都督荆益寧雍梁秦六州其稱秦州仍
是南秦下文進督北秦并前七州孝武帝紀元嘉二十一年加
督秦州明年徙都督雍梁南北秦四州荊州之襄陽竟陵南陵
順陽新野隨六郡諸軍事明帝紀永元元年又徙爲都督雍梁
南北秦四州郢州之竟陵諸軍事沈攸之傳乃以攸之都督荆
湘雍益梁寧南北秦八州諸軍事鎮西將軍荊州刺史紀傳於
南北秦必分別言之

總明觀

百官志總明觀祭酒一人顧煊案宋書明帝紀泰始六年九月

戊寅立總明觀徵學士以充之置東觀祭酒邱靈鞠傳世祖卽位尋領東觀祭酒王謏傳尋以本官領東觀祭酒卽明帝所置總明觀也南史王儉傳宋明帝泰始六年置總明觀以集學士或謂之東觀置東觀祭酒一人總明訪舉郎二人儒玄文史四科科置學士二人其餘令史以下各有差志未分別詳言之

侍中

孝武時侍中何偃南郊陪乘轡輅過白門闕偃將匍帝乃接之曰朕乃陪卿齊世朝會多以美姿容者兼官隨煊案阮韜傳宋孝武選侍中四人並以風貌王或謝莊爲一雙韜與何偃爲一雙常充兼假陸慧曉傳後欲用爲侍中以形短小乃止

嫌名改選

文惠太子傳轉祕書丞以與宣帝諱同不就改除中書郎顧煊案宣帝諱承之承丞同聲字則祖父嫌名字亦得改選矣

南郡獻公主

褚淵傳淵少有世譽復尙文帝女南郡獻公主顧煊案宋書何尙之傳子劭尙太祖第十六女南郡公主當是獻公主初尙何劭改尙褚淵文選褚淵碑文作選尙餘姚公主拜駙馬都尉餘姚其始封也

巴西主

又詔淵妻宋故巴西主埏隊暫啟宜贈南康郡公夫人顧煊案此別是一妻或前或後所未詳也南史褚彥回傳亦作巴西主當是親王之女若是帝女公主不宜贈夫人南史王峻傳子琮

尚始興王女繁昌主周書蘇綽傳子威娶護公女新興公主亦親王女稱主之證

衣裾

王儉傳察太祖雄異先於領府衣裾頤煊案衣裾致敬禮無明文以南史王儉傳證之此下當有脫文

朱靈眞沈攸敬王彌之

柳世隆傳龍驤將軍騎兵參軍朱靈眞沈攸敬靈朔將軍中兵參軍王彌之頤煊案宋書沈攸之傳作朱靈寶沈僧敬王珍之積弩將軍

垣崇祖傳父詢之積射將軍頤煊案詢之宋書附見垣護之傳世祖以爲積弩將軍

劉彌之

會青州援軍主劉珍之背逆歸降注雍本作彌之頤煊案宋書薛安都傳青州刺史沈文秀遣劉彌之張靈慶崔僧旋三軍應安都彌之等至下邳改計歸順珍是彌字之譌

張苟兒

張敬兒傳本名苟兒宋明帝以其名鄙改焉頤煊案南史後廢帝紀越騎校尉張苟兒斬休範

劉從

王敬則傳隨監朔將軍劉懷珍征壽春殷珍傳遣將劉從築四壘於死虎頤煊案宋書殷珍傳以殿中將軍劉順爲司馬又是月劉順柳倫皇甫道烈龐天生等馬步八千人東據宛唐去壽

陽二百里劉從卽劉順蓋避梁諱而改劉懷珍傳同

東陽州

劉懷珍傳元嘉二十八年亡命司馬順則聚黨東揚州遣懷珍將數千人掩討平之頤煊案東揚州當依南史作東陽州晉書地理志羊穆之爲青州刺史築東陽城而居之元帝渡江始置北青州鎮東陽城卽此所謂東陽州也宋書蕭思話傳二十八年亡命司馬順則詐稱晉室近屬自稱齊王聚眾據梁鄒城亦與青州相近

新塗

劉善明傳封新塗伯錢氏考異云塗當作淦頤煊案宋書恩倖傳李道兒新塗縣侯梁書簡文帝紀新塗公大成爲山陽郡公

南史袁顗傳景和元年封新塗縣子此必有新塗縣而宋齊志失書

垣閔

垣榮祖傳子閔宋孝建初累遷龍驤將軍司州刺史義嘉事起明帝使閔出守盱眙北討薛道標封樂鄉縣男頤煊案垣閔非榮祖子此文當有脫誤南史垣閔傳字叔通榮祖從父也父遵見宋書垣護之傳

司州治義陽

呂安國傳泰始四年虜陷汝南司州失守以安國爲督司州諸軍事盩朔將軍司州刺史六年義陽立州治仍領義陽太守頤煊案州郡志泰始中立司州於義陽郡不言其年

元玄度

周山圖傳虜果寇朐山爲元玄度盧紹之所破頤煊案魏虜傳作朐山戍主玄元度魏書蕭道成傳亦作破道成將盧紹之玄元度於朐山

東徐州

桓康傳以康爲持節督青冀二州東徐之東莞琅邪二郡朐山戍錢氏考異云州郡志止有南徐北徐而無東徐之名頤煊案宋書明帝紀泰始三年十一月分徐州置東徐州四年己未以游擊將軍劉懷珍爲東徐州刺史在大明八年以後故宋志不書桓康督東徐在齊建元四年齊志不載當是其後省也

張氏五龍

張岱傳父茂度宋金紫光祿大夫岱少與兄太子中舍人寅新安太守鏡征北將軍永弟廣州刺史辨俱知名謂之張氏五龍
頤煊案宋書張茂度傳茂度子演太子中舍人弟鏡新安太守
皆有盛名並早卒鏡弟永永弟辨廣州刺史辨弟岱昇明末吏
部尙書則辨是岱兄也

湘陰縣

王僧虔傳巴峽流民多在湘土僧虔表割益陽羅湘西三縣緣
江民立湘陰縣從之頤煊案僧虔遷湘州刺史在泰始中湘陰
置縣在大明八年後故宋書州郡志不載

彭城三里

劉悛傳彭城安上里人也彭城劉同出楚元王分爲三里以別

宋氏帝族頤煊案宋書劉延孫傳帝室居綏輿里左將軍劉懷
肅居安上里豫州刺史劉懷武居叢亭里劉懷肅傳高祖從母
兄則三里皆帝族也後祖穎之山南新蔡二郡太守父勔司空
宋書劉勔傳祖懷義始興太守父穎之汝南新蔡二郡太守此
作山南傳寫之譌

北兖州

竟陵王子良傳永明元年都督南兖兖徐青冀五州征北將軍
南兖州刺史頤煊案文選齊竟陵文宣王行狀作遷使持節都
督南兖徐北兖青冀五州諸軍事州郡志亦作北兖州傳於北
兖州皆省北字

南平昌

江祜傳高宗爲驃騎鎮東府以祜爲諮議參軍領南昌太守
頤煊案南史作領南平昌太守州郡志南昌縣名屬豫章郡此當
從南史作南平昌爲正

劉暄

祜議欲立江夏王寶玄劉暄初爲寶玄郢州行事
頤煊案文選頭陀寺碑遠將軍長史江夏內史行事
彭城劉府君諱誼注引蕭子顯齊書亦作劉誼

晉平郡

王秀之傳出爲晉平太守錢氏考異云宋書明帝紀泰始四年
山陽王休祜改封晉平王改晉安郡爲晉平郡而宋齊州郡志
並不載晉平之名此史之漏也
頤煊案宋書州郡志序大校以

大明八年爲正改晉安爲晉平在大明後故宋志不書齊武帝卽位封子子懋爲晉安王此時晉平已復爲晉安故齊志亦不書非史之漏

與子瓚之書

初秀之祖裕致仕隱吳興與子瓚之書曰吾欲使汝處不競之地願煊案宋書王敬弘傳子恢之被召爲祕書郎敬弘爲求奉朝請與恢之書曰祕書有限故有競朝請無限故無競吾欲處汝於不競之地恢之弟瓚之

奕品畫人

蕭惠基傳善隸書及奕基當時能基人琅邪王抗第一品吳郡褚思莊會稽夏赤松並第二品願煊案以善奕入正史前此所

未有也劉繪傳弟瑱字士溫滎陽毛惠遠善畫馬瑱善畫婦人
世並爲第一劉係宗傳少便書畫以畫人人史傳亦始見於此

日蝕

檀超傳班固五星載天文日蝕載五行改日蝕入天文志左僕
射王儉議洪範九疇一日五行五行之本先乎水火之精是爲
日月五行之宗也今宜憲章前軌無所改革顧煊案沈約宋書
蕭子顯齊書日月蝕五星凌犯皆改入天文同超此例

寒官

倖臣傳序元帝用琅邪劉超以謹慎居職宋文世秋當周糾並
出寒門孝武以來士庶雜選如東海鮑照以才學知名又用魯
郡巢尚之江夏王義恭以爲非選顧煊案當時重流品雜選官

卽謂之寒官亦謂寒流紀僧眞傳自寒官歷至太祖冠軍府參軍主簿劉係宗傳泰始中爲主書以寒官累遷至勳品梁書武帝紀天監九年四月革選尙書五都令史用寒流皆是

面首

茹法亮傳孝武末年選白衣左右百八十人皆面首富室頤煊案宋書前廢帝紀山陰公主謂帝曰陛下六宮萬數而妾惟駙馬一人帝乃爲主置面首左右三十人面首謂容貌魁偉之人介士

魏虜傳至比干墓作弔比干文云脫非武發墓誰因嗚呼分土胡不我臣注分土北雍本作介士頤煊案魏孝文弔比干墓碑今尙存諦視之作介士分土是傳寫之譌

諸史考異卷六終

番禺沈寶樞初校陳慶修覆校

諸史考異卷七

臨海洪頤煊撰

梁書

曹武

武帝紀詔又遣左民尚書崔慧景總督諸軍高祖及雍州刺史曹武等並受節制頤煊案南齊書傳作曹虎思廉唐人避唐諱改作曹武

新野郡

於沔南立新野郡以集新附頤煊案宋書州郡志雍州刺史領新野太守何志晉惠帝分南陽立南齊書州郡志雍州亦有新野郡此所立是僑郡

張樂祖

魯山城主僧寄死眾復推助防張樂祖代之頤煊案楊公則傳南齊書和帝紀俱作魯山城主孫樂祖

書薨書卒

天監五年十二月癸卯司徒謝朓薨十一年正月驃騎將軍王茂爲司空十四年四月丁亥王茂薨頤煊案凡史例三公書薨餘官皆書卒中大通元年蕭琛陸杲並特進司空三年二月乙卯特進蕭琛卒四年八月景子特進陸杲卒又不書薨何也

徐州刺史

六年四月以右衛將軍曹景宗爲領軍將軍徐州刺史頤煊案曹景宗傳五年魏托跋英寇鍾離圍徐州刺史昌義之高祖詔

景宗督眾軍援義之不言景宗爲徐州刺史

揚州刺史

普通七年十一月丁亥放魏揚州刺史李憲還北以壽陽置豫州顧煊案陳慶之傳魏豫州刺史李憲力屈遂降遂入其城魏書地形志揚州後漢治歷陽魏治壽春後治建業晉亂置豫州劉裕蕭道成並同景明中改魏之揚州卽梁之豫州也

南北青州

大同四年八月甲辰詔南充北徐西徐東徐青冀南北青武仁潼睢等十三州旣經饑饉曲赦逋租宿債顧煊案晉書地理志自元帝渡江於廣陵僞置青州至是始立北青州治東陽城以僞立州爲南青州後省南青州而北青州直曰青州宋書州郡

志明帝後失淮北於鬱州僑立青州南齊書州郡志青冀二州共一刺史其寄治在鬱州此既言青冀復言南北青當是其後所立隋書地理志琅邪郡沂水縣舊置南青州東海郡懷仁縣梁置南北二青州卽此

合州

太清元年七月改合肥爲合州合州爲南合州顧煊案普通四年六月置合州隋書地理志合浦郡海康縣梁大通中立高州尋又分立合州大同末以合肥爲合州此置南合州

陳帝書名

簡文帝紀太清三年六月西江督護陳霸先起兵攻之顧煊案凡舊史於新君未禪位以前皆尊而不名沈約宋書稱齊王諮

子顯齊書稱梁王皆是思廉梁書雖成於唐貞觀十年其父姚察則陳吏部尙書也禮當爲舊君諱而此直書其名乖史義矣

南荊州

在襄陽拜表北伐魏南荊州刺史李志據安昌城降頤煊案武帝紀大通二年四月南荊州刺史李志以地降不言安昌城魏書地形志無南荊州蠻傳延昌元年桓叔興拜南荊州刺史居安昌隸於東荊安昌城卽南荊治所

蕭方諸

元帝紀大寶元年九月世子方諸爲郢州刺史頤煊案大寶二年閏四月景遣其將宋子仙任約襲郢州執刺史蕭方諸不言世子八月辛亥以鎮南將軍湘州刺史蕭方矩爲中衛將軍方

矩卽愍懷太子世祖第四子而亦不言世子皆史之失

詔文脫字

敬帝紀太平二年詔曰敢忘烈代之至願乎頤煊案陳書高祖紀作敢忘列代之遺典人祇之至願乎此脫五字

徐妃

世祖徐妃傳諱昭佩東海郟人也生世子方等益昌公主含貞太清三年五月被譴死史臣曰徐妃之無行自致殲滅宜哉錢氏考異云徐妃失行不見於本傳而論忽及之疑傳文有漏落也頤煊案徐妃事附見世子方等傳南史言其淫亂最詳

吳郡十城

昭明太子統傳吳郡十城亦不全熟頤煊案南齊書州郡志吳

郡十二縣

張道文

曹景宗傳與州里張道門厚善道門齊車騎將軍張敬兒少子也爲武陵太守敬兒誅道門於郡伏法頤煊案南齊書張敬兒傳子道文武陵內史道暢征虜功曹道固弟道休並伏誅少子道慶見宥道文卽道門聲相近又誤作少子皆史之譌南史張敬兒傳作道門

外兵參軍

蕭穎達傳兄穎胄齊建武末亦爲西中郎外兵參軍俱在西府錢氏考異云按夏侯詳傳稱南康王長史蕭穎胄柳忱傳亦稱西中郎長史蕭穎胄夏侯亶傳稱長史蕭穎胄則其時穎胄實

言身者異者十
以長史行州府事非外兵參軍也頤煊案南齊書蕭穎胄傳世祖有詔除竟陵王司徒外兵參軍和帝爲荊州以穎胄爲冠軍將軍西中郎長史南郡太守行荊州府州事史特未分析言之耳

任漾之

敗輔國將軍任議之於硤口破大將軍劉孝慶於上明頤煊案議之當作漾之南齊書蕭穎胄傳蕭瑱破汶陽太守劉孝慶等於硤口巴東太守任漾之見殺遂至上明穎胄乃追贈任漾之輔國將軍

永光

韋叡傳宋永元初袁顥爲雍州刺史見而異之頤煊案宋無永

元年號當是永光之譌宋書袁顥傳景和元年除雍州刺史前廢帝紀永光元年八月改元爲景和元年景和卽永光也

南鄉郡

范雲傳南鄉舞陰人錢氏考異云宋齊二志俱無南鄉郡而有南鄉縣爲順陽郡治蓋梁時縣武帝父諱改順陽郡爲南鄉耳
顧煊案晉書地理志魏武盡得荊州之地分南陽西界立南鄉郡及武帝平吳改南鄉爲順陽郡武帝紀普通六年長史柳津破魏南鄉郡是其後復立非因避梁諱而改

樂安郡

任昉傳樂安博昌人顧煊案宋書州郡志樂安郡屬青州有博昌縣南齊書州郡志青州無樂安郡此是舉其舊望

郡犯私諱

張稷傳父永宋右光祿大夫稷復爲司馬新興永寧太守郡犯私諱改永寧爲長寧頤煊案此暫時所改去任則否張齊傳普通四年遷鄱陽王司馬新興永寧二郡太守是其證也

王茂先

王珍國傳義師至使珍國出屯朱雀門爲王茂先所敗頤煊案武帝紀王茂曹景宗等犄角奔之將士皆殊死戰珍國之眾一時土崩南史王茂傳一字茂先魏書蕭衍傳俱作王茂先

廣平鄼

馮道根傳廣平鄼人也頤煊案晉書地理志廣平郡無鄼縣鄼縣屬譙郡南史亦作廣平鄼人

邱遲與陳伯之書

陳伯之傳天監四年詔太尉臨川王宏率眾軍北討宏命記室邱遲私與伯之書云云頤煊案文選載此書李善注引劉璠梁典帝使呂僧珍寫書於陳伯之邱遲之辭也與此異

盧循

王儉傳又除儉寧遠將軍南康內史屬盧循作亂頤煊案此與晉末盧循別是一人

衡州

蕭昌傳天監九年分湘州置衡州頤煊案武帝紀天監六年四月分湘廣二州置衡州

平陸縣

明山賓傳天監十五年出爲北兗州刺史初山賓在州所部平陸縣不稔頤煊案宋書州郡志平陸縣屬東平郡南齊書州郡志北兗州東平郡無平陸縣是其後復置

裴邃卒在六年

裴邃傳普通四年進號宣毅將軍是歲大軍將北伐以邃督征討率騎三千先襲壽陽九月壬戌夜至壽陽頤煊案武帝紀作普通五年九月壬戌宣毅將軍裴邃襲壽陽弗尅傳四年當是五年之譌傳明年略地至於鄭城紀作六年其年五月邃卒於軍中夏侯亶傳六年大舉北伐裴邃攻壽陽未尅而邃卒乃加亶使持節馳驛代邃是亦以邃卒在六年與紀合

南定州

夏侯竄傳以竄爲使持節都督豫州緣淮南豫霍義定五州諸軍事錢氏考異云本紀失書定州建立年月頤煊案武帝紀普通四年六月分廣州置成州南定州合州建州分霍州置義州定卽南定魏書地形志亦作南定州

年方六十

顧協傳普通六年湘東王表薦協曰年方六十頤煊案協大同八年卒年七十三普通六年止五十六而云六十者舉成數也南史張率嘗薦之於帝問協年率言三十有五當在天監三年其時年亦相合

俚帥

蘭欽傳經廣州因破俚帥陳文徹兄弟並擒之頤煊案隋書地

理志南海交趾各一都會也其俚人則質直尙信諸蠻則勇敢自立皆重賄輕死唯當爲雄廣州俚蠻雜處別自爲種

錢唐令

王僧孺傳遷治書侍御史出爲唐令頤煊案南史作出爲錢唐令此唐上脫錢字

年長七歲

劉孝綽傳父繪范雲年長繪十餘歲頤煊案南齊書劉繪傳中興二年卒年四十五范雲傳天監二年卒年五十三雲長繪七年不得云十餘歲

南蘭陵郡

張纘傳仍遷北中郎長史南蘭陵太守頤煊案褚球傳孔休源

傳皆作南蘭陵太守唯張綰傳出爲北中郎長史蘭陵太守當是脫南字武帝紀天監元年改南東海爲蘭陵郡陳書高祖紀永定二年改南徐州所領南蘭陵郡復爲東海郡亦有南字

江革三子

江革傳長子行敏官至通直郎早卒次子從簡歷官司徒從事中郎顯煊案南史革長子敏早卒次子德藻德藻弟從簡與此不同德藻陳書有傳

仁州

羊鴟仁傳詔鴟仁督士州刺史桓和之仁州刺史湛海珍等頤煊案武帝紀在太清元年大同四年八月詔已見仁州之名魏書地形志仁州蕭衍置魏因之治赤坎城領臨海郡隋書地理

志彭城郡蘄縣後齊置仁州

殷州

仍爲都督豫司淮冀殷應西豫七州諸軍事錢氏考異云殷州
本紀未詳置立年月隋志項城縣東魏置揚州梁改殷州卽鴉
仁所督之殷州也顧煊案本紀太清元年七月改項城爲殷州
侯景傳詔以西陽太守羊思建爲殷州刺史鎮項城錢氏偶失
檢耳

祖潭之

臧盾傳高祖燾宋左光祿大夫祖潭之左民尙書顧煊案宋書
臧燾傳長子邃邃長子誡之誡之弟凝之凝之弟潭之後廢帝
元徽中爲左民尙書潭之卽潭之之譌

父聞慰

劉霽傳祖乘民宋冀州刺史父聞慰齊正員外弟杳在文士傳
杳在處士傳頤煊案劉杳傳祖乘人宋冀州刺史父懷慰齊東
陽太守有清績在齊書良政傳南齊書劉懷慰傳懷慰本名聞
慰世祖卽位以與舅氏名同敕改之

潮溝

嚴植之傳植之館在潮溝生徒常百數頤煊案伏挺傳宅居在
潮溝於宅講論語聽者傾朝朱异傳异及諸子自潮溝列宅至
青溪其中有臺池翫好每暇日與賓客遊焉

華林遍略

何思澄傳天監十五年敕太子詹事徐勉舉學士入華林苑撰

遍略勉舉思澄等五人以應選顧煊案南史勉舉思澄顧協劉
杳王子雲鍾嶠等五人以應選八年乃書成合七百卷隋書經
籍志華林遍略六百二十卷梁綏安令徐僧權等撰辨正論梁
武皇帝使劉杳顧協等一十八人於華林苑中纂要七百二十
卷名曰遍略撰人不同卷數亦異北齊書祖珽傳以遍略數帙
質錢擣蒲文襄杖之四十

楮酒

劉杳傳在任昉坐有人餉昉酒而作楬字昉問杳此字是不
杳對曰葛洪字苑作木旁若頤煊案廣雅楮槲奈也文選南都
賦注引廣雅若槲石槲也顏氏家訓書證篇吳人呼蓋爲竹簡
反故以木旁作楬代蓋字楬非楮字之本義

七十二

何胤傳胤家世年皆不永唯祖尙之七十二頤煊案宋書何尙之傳大明四年薨於位時年七十九

洗枯骨

顧憲之傳齊高帝卽位除衡陽內史土俗山民有病者輒云先人爲禍皆開冢剖棺木洗枯骨名爲除祟頤煊案嶺南風俗至今猶然而官不能禁觀此傳其由來已久南齊書有顧憲之傳與此傳詳略不同

劉秉

陶季直傳時劉景袁粲以齊高帝權勢日盛將圖之頤煊案宋書作劉秉此避唐諱嫌名改作景

東陽太守

伏臘傳高祖徵爲東陽太守在郡清恪屬縣始新遂安海鹽並同時生爲立祠頤煊案南史作新安太守宋書州郡志南齊書州郡志始新遂安海鹽三縣皆屬新安郡非東陽屬縣

區粟城

林邑國傳二十三年使交州刺史檀和之振武將軍宗慤伐之乃遣大帥范扶龍戍其北界區粟城頤煊案宋書宗慤傳作元嘉二十二年區粟城作粟城

太清五年

武陵王紀傳太清五年夏四月紀帥軍東下至巴郡以討侯景爲名將圖荆陝頤煊案元帝紀作太清六年八月

臨江郡

侯景傳景以錢塘爲臨江郡富陽爲富春郡顧煊案元和郡縣志陳禎明中置錢塘郡隋書地理志錢塘舊置錢塘郡平陳廢郡臨江是暫時所置故不書

諸史考異卷七終

番禺沈寶樞初校陳慶修覆校

諸史考異卷八

臨海洪頤煊撰

陳書

李賁

武帝紀賁竄入屈獠洞中屈獠斬賁傳首京師是歲太清元年也頤煊案梁書武帝紀作太清二年三月

廣梁郡

永定二年八月以廣梁郡爲陳畱郡頤煊案陳詳傳賁割故鄣廣德置廣梁郡以詳爲太守高祖踐阼改廣梁爲陳畱又以爲陳畱太守隋書地理志綏安縣梁末立大梁郡又改爲陳畱大梁卽廣梁避隋諱改

縉州

三年閏四月詔曰吳州縉州去歲蝗旱頤煊案畱異傳紹泰二年除縉州刺史領東陽太守世祖卽位改授都督縉州諸軍事縉州刺史領東陽太陽隋書地理志不載縉州之名元和郡縣志孫皓分會稽置東陽郡陳武帝置縉州

會稽十郡

文帝紀以功授持節都督會稽等十郡諸軍事宣毅將軍會稽太守頤煊案會稽太守持節都督諸軍事止有會稽東陽新安臨海永嘉五郡徐度沈恪傳並云都督會稽東陽臨海永嘉新安新寧信安晉安建安九郡諸軍事此云十郡天嘉六年三月乙未詔侯景以來遭亂移在建安晉安義安邵者並許還本土

其被略爲奴婢者釋爲良民三郡毘連疑卽并此而十也

秦郡

宣帝紀太建五年四月吳明徹克秦州水柵齊軍救秦州吳明徹又破之五月秦州城降頤煊案吳明徹傳秦州皆作秦郡隋書地理志六合舊置秦郡後齊置秦州是降後仍復爲秦郡也

神農郡

七年三月移譙州鎮於新昌郡以秦郡屬之盱眙神農二郡還隸南兗州頤煊案隋書地理志高郵梁置廣業郡尋以有嘉禾爲神農郡開皇初郡廢

廣陵

十二年九月周廣陵義主曹藥率眾入附頤煊案魏書地形志

廣陵郡興和中分東豫州置領宋安光城安蠻新蔡汝南五縣
五年九月左衛將軍樊毅克廣陵楚子城亦卽此郡

山陽王

後主紀至德元年十月立皇帝叔宣爲陽山王
頤煊案本傳作山陽王

臨海王

四年二月立皇帝叔顯爲臨江王
頤煊案本傳作臨海王

臨澤

杜僧明傳廣陵臨澤人也
頤煊案隋書地理志毘陵郡義興縣
又廢義鄉國山臨澤三縣入焉
南齊書州郡志臨澤作臨津屬
海陵郡

隨高宗入援

侯景之亂隨高宗入援京師高宗於始興破蘭谿頤煊案高宗當作高祖

壽昌縣

周文育傳少孤貧本居新安壽昌縣頤煊案南齊書州郡志壽昌桐廬並屬吳郡隋書地理志雉山縣舊置新安郡桐廬縣屬焉其時壽昌縣亦當屬於新安郡

拍卽礮字

侯安都傳安都引船入堰起樓艦與異城等放拍碎其樓雉頤煊案侯瑱傳眾軍施拍縱火黃法氈傳乃爲拍車及步艦堅拍以逼歷陽歷陽人窘蹙乞降文選閒居賦礮石雷駭李善注礮

石今之拋石也後漢書袁紹傳操乃發石車擊紹樓皆破李賢注卽今之拋車拋車卽拍車皆聲之轉

高州有二

黃法甌傳太平元年割江州四郡置高州以法甌爲高州刺史鎮於巴山頤煊案隋書地理志臨川郡崇仁縣梁置巴山郡此與高涼郡之高州不同

東西寧

潘子量傳尋出爲持節都督桂定東西寧等四州諸軍事桂州刺史頤煊案周書陽雄傳遷西寧州總管隋書梁昆傳開皇初出爲西寧州刺史大業初改爲縣隋書地理志始安郡梁曰桂州義熙縣舊置東寧州

樂山郡

劉仲威傳歷樂山豫章二郡太守
頤煊案隋書地理志巴陵郡
沅江縣梁置曰藥山仍爲郡
平陳郡廢縣改曰安樂
藥山卽樂山之譌

南北新蔡

華皎傳尋詔督尋陽太原高唐
南北新蔡五郡諸軍事
頤煊案魯廣達傳除假節信武將軍
北新蔡太守

巴山太守

又令巴山太守黃法𪔐別從宜陽
出澧陵
頤煊案法𪔐傳祇言爲高州刺史
鎮于巴山不言爲巴山太守
得此可補其闕
法𪔐巴山新建人

杜陽

杜陽太守曹宣頤煊案隋書地理志無杜陽郡當是桂陽之譌

荆信祐三州

陸子隆傳尋遷都督荆信祐三州諸軍事荊州刺史是時荊州
新置治公安頤煊案沈恪傳光大二年遷使持節都督荆武祐
三州諸軍事荊州刺史隋書地理志南郡公安縣陳置荊州武
陵郡梁置武州巴東郡梁置信州不載祐州治所

昌州

袁憲傳京城陷入于隋隋授使持節昌州諸軍事開府儀同三
司昌州刺史頤煩案隋書地理志舂陵郡西魏改曰昌州周弘
直傳歷雲麾將軍昌州刺史梁末已有此州

狎客王瑗

江總傳日與後主遊宴後庭共陳暄孔範王瑗等十餘人謂之狎客頤煊案南史陳暄傳後主卽位遷通直散騎常侍與義陽王叔達尙書孔範度支尙書袁權侍中王瑳金紫光祿大夫陳暄御史中丞沈瓏散騎常侍王儀等恆入禁中陪侍游宴謂之狎客隋書高祖紀作王嵯

迎主簿

蔡徵傳梁承聖初高宗爲南徐州刺史召補迎主簿頤煊案江總傳父紇本州迎主簿隋書百官志上上州刺史州屬官有都光迎主簿

逍遙郡

樊毅傳後主卽位改封逍遙郡公邑三千戶
頤煊案隋書地理志始安郡豪靜縣陳置逍遙郡

江德藻

江德藻傳字德藻濟陽考城人
頤煊案南史亦作德藻字德藻
汲古閣本作德操字德藻是淺人所改

大寶紀年

何之元傳至在太宗雖加美謚而大寶之號世所不遵蓋以拘
於賊景故也承聖紀麻自接太清神筆詔書非宜輒改
頤煊案元帝承制不用大寶年號在權制則可而後人論定終不能抹
卻簡文一代紀元此論未爲平允

臨海

陳寶應傳自海道寇臨安永嘉及會稽餘姚諸暨頤煊案臨安
當作臨海

錢肅

前宣威太守錢肅頤煊案周迪傳宣城太守錢肅

諸史考異卷八終

番禺沈寶樞初校陳慶修覆校

諸史考異卷九

臨海洪頤煊撰

魏書上

盛樂

太祖紀登國元年二月幸定襄之盛樂三月劉顯自善無南走馬邑頤煊案漢書地理志作成樂屬定襄郡善無馬邑屬雁門郡

改代爲魏

天興元年六月詔有司議定國號羣臣以爲應以代號詔宜仍先號以爲魏頤煊案登國元年正月帝卽代王位四月改稱魏王至是始議定焉

寒食散

天賜六年初帝服寒食散自太醫令陰羌死後藥數動發至此逾甚頤煊案晉書裴秀傳服寒食散當飲熱酒而飲冷酒薨皇甫謐傳謐初服寒食散而性與之忤每委頓不倫嘗悲恚叩刀欲自殺隋書經籍志有寒食散論二卷寒食散對療一卷解寒食散方二卷解寒食散論三卷今外臺祕要千金翼方內猶傳其法

娥清

太宗紀泰常二年十一月司徒長孫嵩遣娥清周幾與叔孫建討西山頤煊案晉書安帝紀作魏將鵝青

論語正名

世祖紀始光二年初造新字千餘詔曰孔子曰名不正則事不成今制定文字世所用者頒下遠近永爲楷式願煊案論語必也正名乎集解馬融曰正百事之名也儀禮聘禮疏引鄭注論語云古者曰名今世曰字此詔引論語從鄭義

徵士人數

神䴥四年遂徵玄等及州郡所遺至者數百人皆差次敘用願煊案高允傳神䴥已後訪諸有司以求名士咸稱范陽盧玄等四十二人親發明詔以徵玄等其就命三十五人又云昔歲同徵零落將盡感逝懷人作徵士頌蓋止於應命者其有命而不至則闕焉此稱數百人蓋統州郡所遺至者而言

廣陵

太平眞君三年征南將軍東安公刁雍東趨廣陵錢氏考異云此非揚州之廣陵在今光州息縣魏時嘗置東豫州於此頤煊案宋書索虜傳征南將軍徐兗二州刺史東安公刁雍東趨廣陵南至京口此當是揚州之廣陵錢氏說誤

蒙山

高祖紀延興元年劉彧將垣崇祖率眾二萬自郁州寇東兗州屯于南城固頤煊案南齊書垣崇祖傳崇祖率數百人入虜界七百里據南城固蒙山扇動郡縣漢書地理志泰山郡蒙陰禹貢蒙山在西南續漢志南城縣名屬泰山郡

乾象六合殿

太和三年二月壬寅乾象六合殿成頤煊案四年正月癸卯乾

象六合殿成此不應重出北史無此句當是衍文

孔子閉房記

九年正月戊寅詔自今圖讖祕符及名爲孔子閉房記者一皆焚之畱者以大辟論頤煊案隋書王充傳有道士恒法嗣者自言解圖讖充昵之法嗣乃以孔子閉房記畫作丈夫持一竿以驅羊其時尚有傳本

周文公

十六年詔祀唐堯于平陽虞舜于廣寧夏禹于安邑周文于洛陽錢氏云周文當爲周公之謬頤煊案禮志作周文公制禮作樂垂範萬葉可祀于洛陽此省公字

南徐州

世宗紀太和二十三年南徐州刺史沈陵南叛頤煊案劉芳傳亦作南徐州刺史沈陵外叛盧玄傳作徐州刺史沈陵密謀外叛無南字隋書地理志下邳郡後魏置南徐州梁改爲東徐州

義州

正始元年九月蕭衍霍州刺史田道龍義州刺史張宗之遣使內附頤煊案梁書武帝紀天監六年十二月分豫州置霍州普通四年六月分霍州置義州正始元年當梁天監三年其時霍州義州俱已分置在前

司馬悅

永平元年十月豫州彭城人白早生殺刺史司馬悅據城南叛蕭衍遣將齊苟仁等四將以助之頤煊案梁書馬仙琕傳作魏

豫州人白早生殺其刺史琅邪王司馬慶曾齊苟仁作齊苟兒
司馬楚之傳悅字慶宗曾宗聲之轉

徐元明

延昌二年二月蕭衍郁州民徐玄明等斬送衍鎮北將軍青冀
二州刺史張稷首以州內附頤煊案游肇傳作蕭衍軍主徐玄
明奚康生傳作蕭衍直閣將軍徐玄明梁書張稷傳作州人徐
道角等夜襲州城害稷

弘化太守

肅宗紀延昌四年十月蕭衍弘化太守杜桂舉郡內屬頤煊案
隋書地理志弘化郡西魏置朔州朔方郡巖綠縣西魏置弘化
郡

七州治所

熙平二年城青徐兗涇平營肆七州所治東陽歷城瑕邱平涼肥如和龍九原七城錢氏攷異云諸州治所地形志具載之惟涇州志云治臨涇城而紀云平涼未詳頤煊案隋書地理志安定郡舊置涇州陰盤後魏置平涼郡臨涇亦屬安定郡當是涇州前治在平涼後移治在臨涇城地形志徐州治彭城齊州治歷城以所治考之徐州當是齊州之譌

南秀容

正光五年八月丁酉南秀容牧子于乞眞反殺太僕卿陸延別將尔朱榮討平之頤煊案尔朱榮傳作南秀容牧子萬子乞眞反

東魏郡

孝昌元年二月齊州魏郡民房伯和聚眾反顓頊案地形志齊州有東魏郡此魏郡上當脫東字

南荊州

孝莊紀建義元年六月辛卯南荊州刺史李志據城南叛顓頊案李彪傳子志桓叔興外叛南荊荒毀領軍元叉舉其才任撫導擢爲南荊州刺史建義初叛入蕭衍故地形志不載

瓜州

癸卯以高昌王世子光爲平西將軍瓜州刺史奏臨縣開國伯顓頊案出帝紀高昌傳俱作泰臨縣地形志瓜州郡縣闕隋書地理志敦煌郡舊置瓜州

宥州

出帝紀永熙元年夏州徙民郭遷據宥州反刺史元嶷棄城走
詔齊州刺史尉景濟州刺史蔡儁攻討之颺煊案常山王傳嶷
出帝初授兗州刺史于時城人王奉伯等相扇謀逆棄城出走
詔齊州刺史尉景本州刺史蔡儁往討之宥州當是濟州之譌
魏分爲三

孝靜紀帝諱善見清河文宣王亶之子也出帝旣入關齊獻武
王奉迎不克乃與百寮會議推帝以奉肅宗之後改永熙三年
爲天平元年武定八年遜位于齊颺煊案魏收仕齊撰魏書自
以孝靜爲正統陳書何之元傳今以未分之前爲北魏旣分之
後高氏所輔爲東魏宇文所挾爲西魏張太素天文志稱東西

帝隋書地理志有後魏東西魏之分皆不同收例

揚州

元象元年二月豫州刺史堯雄攻揚州拔之顧煊案隋書地理志淮南郡舊曰豫州後魏曰揚州梁曰南豫州東魏曰揚州李順傳蕭寶卷豫州刺史裴叔業以壽春歸附詔煊率眾迎接入城撫慰仍行揚州事卽其證錢氏攷異改此揚州作陽州非是餘見梁書

新安郡

上黨王天穆傳時青州刺史元世儵表置新安郡以杲爲太守顧煊案地形志青州無新安郡而義州有之興和中置

則問

東陽王丕傳每於則問令丕坐觀頤煊案則當作測隋書刑法志凡繫獄者不卽答款應加測罰不得以人事爲隔斷食三日聽家人進粥二升女及老小一百五十刻乃與粥滿千刻而止

平原郡

常山王素傳休屠郁原等叛素討之斬渠帥徙千餘家於涿鹿之陽立平原郡以處之頤煊案地形志平原郡漢高帝置皇始中屬冀州卽此郡

滄州

遼西公傳洪超持節綏慰冀部還上言冀土寬廣界去州六七百里負海險遠宜分置一州鎮遏海曲朝議從之後遂立滄州頤煊案地形志滄州熙平二年分瀛冀二州置治饒安城

燕州昌平郡

京兆王傳羅侯遷洛之際以墳陵在北遂家於燕州之昌平郡就拜昌平太守頤煊案宋弁傳維黜爲燕州昌平郡守地形志東燕州太和中分恆州東部置燕州平昌郡卽昌平郡之譌馮文通

樂平王丕傳初馮宏之奔高麗頤煊案海夷馮文通傳本名犯顯祖廟諱此稱其名非史本文

渤海郡

廣陵王羽傳羽食渤海郡之東光二千戶頤煊案地形志渤海郡有二一屬冀州一屬青州東光屬冀州之渤海郡

桓帝碑

衛操傳桓帝崩後操立碑于大邗城南以頌功德皇興初雍州別駕雁門段熲於大邗掘得此碑文雖非麗事宜載焉故錄於傳頤煊案此碑不載於帝紀而載在操傳亦作史者重金石文之證

董京霍原

崔玄伯傳元伯同郡董謚謚父京時廣陽霍原等俱以碩學播名遼海頤煊案董京霍原晉書俱在隱逸傳

崔宏

長孫嵩傳太宗卽位與山陽侯奚斤北新侯安同白馬侯崔宏等八人坐止車門右聽理萬機頤煊案崔玄伯傳名犯高祖廟諱紀傳皆稱其字此獨稱名當是後人所改

赫連屈丐

赫連屈丐土宇不過千里頤煊案丐當作子鐵弗傳屈子本名勃勃太宗改其名曰屈子屈子者卑下也

筆公

古弼傳以敏正稱太宗嘉之賜名曰筆取其直而有用後改名弼言其輔佐材也頤煊案下文弼頭尖世祖常名之曰筆頭是以時人呼爲筆公筆非賜名亦不取正直爲義

原平

張黎傳雁門平原人也頤煊案地形志當作原平

諡曰文

封懿傳興之出爲瀛冀二州平北府長史天平中重贈殿中尙

書諡曰孝注一作文頤煊案新唐書世系表作諡曰文

高陽太守

屈遵傳太祖南伐高陽太守崔玄伯東走海濱頤煊案崔玄伯傳作高陽內史

馮代彊

崔浩傳浩寫急就章從小至老所書蓋以百數必稱馮代彊以示不敢犯國頤煊案王海急就章本作馮漢強顏師古注漢強意在忠於本朝也浩易漢爲代亦同此意

中山王熙

刁雍傳相州刺史山陽王熙在鄴起兵將誅元叉等事敗傳首京師頤煊案盧同傳元叉之廢靈太后也相州刺史中山王熙

起兵于鄴刁雙傳正光初中山王熙之誅也熙弟略投命於雙
明帝紀正光元年八月甲寅相州刺史中山王熙舉兵欲誅又
騰不果見殺中山王英傳熙延昌二年襲封此作山陽王誤

太原王氏

王慧龍傳自云太原晉陽人司馬德宗尙書僕射愉之孫頤煊
案晉書王愉爲王坦之之子王湛玄孫王湛字處沖司徒渾之
弟渾傳云太原晉陽人則慧龍本太原王氏而北人不乏信故
稱自云

東徐州

徵娶徐州刺史崔鑒女頤煊案下文歡婚自東徐還則鑒之爲
徐州刺史是東徐州刺史省東字李彪傳崔鑒傳俱作東徐州

刺史

太州

薛辯傳長瑜天平中爲洛州刺史歿于陳贈都督冀定太三州
諸軍事車騎將軍冀州刺史錢氏攷異云大州蓋天平中所置
而地形志無之頤煊案薛野賭傳高宗初賜爵順陽子和平中
除并州刺史轉太州刺史在治有聲

中川郡

寇讚傳臻字仙勝顯祖末爲中川太守頤煊案地形志中川郡
太平初置顯祖末已有此郡天平初當是復置

兗州刺史

劉休賓傳稍遷幽州刺史鎮梁鄒頤煊案幽州當是兗州之譌

下文慕容白曜軍至升城遣人說之令降休賓不從會劉彧遣使授休賓輔國將軍兖州刺史文晁對曰臣亡父休賓劉氏持節兖州刺史成梁鄒皆其證北史劉休賓傳仕宋爲兖州刺史不作幽州

兄子聞慰

休賓密與其兄子聞慰議爲降計顓頊案聞慰改名懷慰乘民子見南齊書良政傳

東荊州三郡

韋閻傳珍又破慧景擁降民七千餘戶內徙表置城陽剛陵義陽三郡以處之高祖詔珍移鎮北陽顓頊案隋書地理志淮安郡後魏置東荊州治比陽縣三郡皆當屬於東荊州地形志州

郡俱不置

北幽州

李訢傳父崇延和初歸降世祖以崇爲平西將軍北幽州刺史
頤煊案地形志無北幽州下文世祖曰云何不取幽州刺史李
崇老翁兒也無北字

疥

盧玄傳道虔尙高祖女濟南長公主公主先無疥患倉卒暴發
頤煊案此卽今世所謂痘瘡也字書無痘字古通呼之爲疹玉
篇疹癢疹皮外小起也

徵士頌

高允傳又以昔歲同徵零落將盡感逝懷人作徵士頌頤煊案

傳中列盧玄以下三十四人銜名以本傳考之多不同李順傳初順與從兄靈從弟孝伯竝以學識器業見重於時此傳無孝伯當是徵而未至靈與族叔詵族弟熙等俱被徵事在高允高士頌李熙傳字仲熙神麀中與高允等俱被徵此傳作李遐仲熙與雁門李熙別是一人李叔虎傳從祖金世祖神麀中與高允俱被徵位至征南從事中郎將此傳作李欽韋閬傳字友觀此傳字友規結銜稱征西大將軍從事中郎本傳不載邢穎附其孫邢蠻傳稱拜中書侍郎假通直常侍監朔將軍平城子此傳稱中書郎武恆子張誕附張袞傳稱除中書侍郎通直散騎常侍建威將軍賜爵容城子此傳止稱中書郎此傳盧玄結銜稱固安伯高濟稱浮陽侯盧同本傳高濟附其子遵傳俱不載

東徐州

尉元傳劉彧東徐州刺史張譙據團城頤煊案地形志南青州
治團城顯祖置爲東徐州太和二十二年改

東兖州

中書侍郎李璨與畢眾敬對爲東兖州刺史頤煊案畢眾敬傳
皇興初就拜散騎常侍宣南將軍兖州刺史賜爵東平公與中
書侍郎李璨對爲刺史無東字

南濟陰郡

元表淮陽郡上黨令韓念祖錢氏考異云案尉元在徐州表稱
南濟陰郡睢陵縣人趙憐等乞念祖爲令詔聽如請然地形志
無上黨睢陵二縣并未見南濟陰郡名頤煊案地形志南濟陰

郡治竹邑城孝昌中陷武定五年復錢氏偶失檢耳南濟陰郡與淮陽郡同屬徐州睢陵縣武定六年置屬淮陽郡不屬南濟陰郡上黨縣本寄治在淮陽郡見北史徐皓傳尉元爲徐州刺史治彭城延興元年五月假元淮陽王因得表淮陽郡上黨令者其刺史職也地形志淮陽郡不載上黨寄治宋書州郡志上黨令屬淮陽太守

平齊郡

慕容白曜傳崔道固及兖州刺史梁州守將劉休賓竝面縛而降白曜送道固休賓及其寮屬於京師後乃徙二城民望於下館朝廷置平齊郡懷宣歸安二縣以居之顓頊案劉休賓傳及立平齊郡乃以梁鄒民爲懷宣縣崔崇吉傳立平齊郡以歷城

民爲歸安縣崔念遠傳慕容白曜送崔道固赴都詔徙青齊土望共道固守城者數百家於桑乾立平齊郡於平城西北北新城尋徙治京城西南二百餘里舊陰館之西隋書地理志馬邑郡雲內後魏立平齊郡尋廢故地形志不載

東青州

韓茂傳先是河外未賓民多去就故權立東青州爲招懷之本新附之民咸受優復錢氏云東青州未詳所在顏煊案宋書明帝紀泰始四年八月分青州置東青州尋朝議罷之隋書地理志平原郡平原後魏置東青州置未久而廢

張湛

張湛傳字子然一字仲玄敦煌人顏煊案此與注列子者隋書

經籍志東晉光祿勳張湛別是一人

蒼雅林說

游明根傳肇博通經史及蒼雅林說頤煊案謂三蒼廣雅字林說文也

北徐州

劉芳傳思祖叛奔蕭衍衍以思祖爲輔國將軍北徐州刺史頤
寇淮北頤煊案南齊書州郡志北徐州鎮鍾離地形志楚州蕭
衍置北徐州武定七年改治鍾離城

殷州四郡

崔辯傳孝昌初分定相二州四郡置殷州以楷爲刺史頤煊案
地形志殷州孝昌三年分定相二州置治廣阿殷州所領止三

郡

諸史考異卷九終

番禺沈葆和初校鄭權覆校